

E S T U D I O S

DOS ASPEUTOS D'INTRES EN A ONOMASTICA D'IBIECA: OS SUFIXOS ACHIQUIDORS Y OS RESULTATOS DE VALEM

POR FRANCHO NAGORE LAIN

INTRODUZIÓN.


Ibieca se troba en o Semontano de Uesca, enta par de o Sur de a Sierra Guara. En l'autualidá, seguntes o Zenso de 1981, tien 136 abitadors.

Ye clabata a 640 m. d'altaria y a 23 km. de Uesca. Bi ha un solo nucleyo poblato, de *habitat* concentrato, que ye capeza de o propio monezipio.

En o conchunto d'edificacions destanbelas de o sieglo XVIII. A más gran parti conserba bien as carauteristicas de l'arquitectura popular de a redolada, en a que predominan as construzions feitas con sillars d'arenisca, bien tallatos, en as cantonadas y en os cobaxos de as fronteras, y ladrillo en os cobaltos y en os paramentos intermeyos.

A unos 3 km. enta o Sureste de o lugar, en un puesto en o que —seguntes dizén— bi abió una poblazón meybal (Fozes, de o siñor feudal Atón de Fozes), se debanta l'armita de San Miguel de Fozes, imponente edifizio de o sieglo XIII, de transición de o romanico enta o gotico, con intresans pinturas murals de o sieglo XIV.

O centro comerzial y de serbizios d'Ibieca ye Uesca, ta do tien que baxar a población infantil a fer a segunda etapa d'*Enseñanza General Básica*, pus en Ibieca sólo ye posible fer a primera.



O termino monezpal d'Ibieca, en o Semontano.

As autibidaz economicas se zentran en l'agricultura de secano (ze-rials, almendrera, olibera), con o complemento de bellas güertas (trunfas, ortalizias, frutals) y bella cosa de bistiar lanar. Antiparti, bi ha bella chiqueta industria (o forno de pan) y serbizios comerzials (botigas de comestibles, carnezería u tabla, bar).

A poblazión s'ha arrebaxato a o largo de o sieglo xx: 401 abitadors en 1900; 284 ab. en 1950; 147 ab. en 1978 y 136 en 1981. Con to y con ixo, conserba encara bella importanzia como zentro comerzial intermeyo ta atros lugars más chiquez de a redolada, como Aguas (50 abitadors), Labata (39 ab.), Lieza (98 ab.), Panzano (58 ab.), Santa Zilia (5 ab.), Coscullano (43 ab.), Loszertales (15 ab.) y Sipán (13 ab.).

As notas que ban debán son complementarias a ra replega sistematica de a Onomastica d'Ibieca, feita por meyo de o *Cuestionario de T. BUESA OLIVER* (Universidad de Zaragoza, 1977). Se refieren a bels aspeutos concretos, como son os sufíxos achiquidors en os topónimos y en os nombres de presona y os resultados de V A L L E (M), d'especial intrés por o tratamiento de a -LL- entre bocals.

OS SUFIXOS ACHIQUIDORS EN A TOPONIMIA.

O sufixo -eta-.

Uno de os sufíxos achiquidors que más a ormino s'emplegan, tanto en nombres comuns como en nombres propios, ye *-eta*, que se rechistró en os siguiens topónimos:

As Cruzetas

As Canaletas / A Canaleta

Barranco a Canaleta

Fuente a Canaleta

Balseta de Camino Angüés (*balseta* ye termino achiquito de *balsa*)

As Fajetas de Naya (*fajeta* ye termino achiquito de *faja*, *castellano* 'haza').

Plazeta Bescós

badineta 'badina chiqueta' (*badina*, cast. 'remanso en un río')

pozeta 'puesto en do cayen os caños de a fuen'

ereta, termino achiquito de *era* 'trozet de güerta adedicato a o cautibo de bella ortalizia u planda determinada'. Por exemplo: *una ereta de zebollas*.

O sufixo *-eta* tien un emplego muito bibo en o charrar cutiano, a o que no son allenos os terminos toponimicos debanditos: *cruzeta*, *fajeta*, *plazeta*, *bardineta*, ezetra, son terminos comuns en a fabla biba. Como exemplo en atros cambios lesicos, d'entre o bocabulario que se replegó, se podeba cuaternar: *palometa*, cast. 'mariposa'.

Ye de notar qu'en todas as ocasions anteriors o sufixo amanexe en a suya traza femenina. En a traza masculina estió documentato sólo qu'una begata: *Barranco Migueler*. A traza *-er*, que antiparti puede ascuitá-se en cualesquier inte en a fabla biba, podeba esplicá-se por un afloxamiento en a prenunzia que sonorizarba ra *-t*, seguito d'un debantamiento muito lixero de a punda de a luenga enta o paladar de debán: *-t* > *-d* > *-r*.

O sufixo -ón-.

Un atro sufixo que a ormino se bei en a toponimia d'Ibieca ye *-ón*, que destaca por o suyo balor achiquidor, tipico en aragonés:

tozalón 'tozal, cuan ye chiquet'
serretón 'altaria chiqueta y alargada, loma'
foricón 'forato en o terreno'
ballón 'bal chiqueta', cast. "vaguada" (*O Ballón d'os Güertos, O Ballón d'os Bieros*¹).
pinarrón 'pino chicorrón'

O sufixo -illo-.

O sufixo *-illo* / *-illa* se manifiesta prauticamén en toz os casos en ista forma, más moderna que otras posibles soluzions que aparixen a ormino en a Toponimia altoaragonesa, como *-iello* o *-iecho*.

1. Ta *Bieros* cast. 'caminos', traza usual sólo en toponimia, poderba pensá-se en una etimoloxía VIARIUS. Iste toponimo ye documentato en otras redoladas de l'Alto Aragón. Asinas, en Panticosa bi ha una carrera conoxita como *Biero* (Cfr. J. J. GUILLÉN, *Toponimia del valle de Tena*, Zaragoza, 1981, pp. 142 y 161).

Estiò documentato en os siguiens casos:

As Marrotillas

Camino d'a Marrotilla

Regano de Fornillos

As Fuentes d'o Fornillo

Güertos de os Fornillos

Regano de Balillas

canzillo 'chiquet' cauze en a güerta' ("Os canzillos son igual que os rasos, pero más delgadetes, pa guiar l'agua n'a era").

Antimás, en atros casos, que merexen un comentario un poquet más amplo:

a) *As Paulillas*. Seguntes os informadors, se replegó ista forma y a forma *As Paulellas*, que tamién se rechistra en *Camino de As Paulellas*. Se trata d'un conchunto de cambios de cautibo, clabatos enta o sur de l'armita de San Miguel de Fozes, en ballonadas que s'ubren entre chiquetas canteras.

Parixe que no bi ha duda en que cal considerá-lo com'un termino achiquito de *paúl*². A barián *Paulellas* poderba esplicá-se por una redución de o diptongo *-ie-* > *-e-* en o sufixo orixinal *-iella* < *-ELLA*. Pero no cal olvidar a posible metafonía de a *-A* zaguera en a *-E* de o sufixo, impedindo u dificultando a suya diptongazión. Asinas se poderba esplicar o feito de qu'en a Toponimia altoaragonesa nos trobemos a ormino *-ella* fren a *-iello* (por exemplo: *Barella* fren a *Badiello*).

Paulella se rechistra tamién en Tramacastilla y Saqués (valle de Tena)³.

b) *Os Portechillos*. Puedestar que siga o topónimo con más barians de toz os replecatos. Se documentó tamién en as trazas: *O Portechillo*, *Os Portrechillos* y *Os Portichillos*. Y tamién en o topónimo *Corona de Portichillos*.

Poderba pensá-se en a etimoloxía:

PORTELLU(M) > *Portiecho* + *-illo*,

con un amotolonamiento emponderador de sufixos achiquidors, en fé-se

2. *Paúl* "f. Pradería común. / Terreno hondo cubierto de césped y que por húmedo no se cultiva". J. PARDO ASSO, *Nuevo diccionario etimológico aragonés*, Zaragoza, 1938, p. 169, s.v. A mesma senificación, adibindo "pantano", da R. ANDOLZ, *Diccionario aragonés*, Zaragoza, 1984², p. 213, s.v. Prozede de PADULE, metatesis de o latín *PALUDE(M)*.

3. J. J. GUILLÉN, *Toponimia del valle de Tena*, pp. 90, 150 y 160.

escurizo ro senificado achiquidor de *-iecho*. Seguntes ista ipotesis, sérbanos debán d'una solución *-ch-* prozedén de *-LL-*, de a que tamién bi ha belatra contrimuestra en a Toponimia d'Ibieca, como *As Bachirgualas*, de que se trata decamín.

O sufixo -uala-.

O sufixo *-uala* / *-uelo* < *-OLA* / *-OLUS* ye presén en *As Bachirgualas* (tamién rechistrato como *A Bachirguala*) y en *Tiñargüelos*.

Como s'esplica dimpués, *As Bachirgualas* poderba prozeder de **VALLEROLAS*, por o que trobamos un atra begata ra soluzion *-LL- > -ch-*.

Fren a o diptongo *-ua* de *Bachirgualas* trobamos o diptongo *-ue* en *Tiñargüelos*. Ye dizir, bi ha una alternanzia *-uala* / *-uelo*, que puede esplicá-se por una influyenzia metafonica de a bocal zaguera.

Entre os nombres de plandas d'Ibieca s'ha replegato *biñarguala* “hierba muy buena, que hace cabecicas que se pegan y no se pueden sacudir; la comen muy bien los animales si está tierna”. Tamién se puede fer constar a barián *mierguala*, emplegata en Labata. En os dos casos coinzide a diptogación *-ua-* en palabras femeninas, fren a *-ue-* en as masculinas. Parixe que también en atras redoladas altoaragonesas se da ista alternanzia. Asinas, si chitamos una güellada en o endize de a *Toponimia del valle de Tena*, de J. J. GUILLÉN, i beyemos *-uala* en femeninos fren a *-uelo* en masculinos:

<i>Arezualas</i>	<i>Articazuelo</i>
<i>Bachigualas</i>	<i>Astargüelo</i>
<i>Bachisuala</i>	<i>Peñazuelo</i>
<i>Barigualas</i>	<i>Permenazuelo</i>
<i>Faxuala</i>	<i>Puyazuelo</i>
<i>Mazañuala</i>	<i>Sandaruelo</i>
<i>Napazualas</i>	<i>Torozuelo</i>
<i>Penazuala</i>	<i>Zerrigüelo</i>
<i>Petrozualas</i>	
<i>Sacargualas</i>	
<i>Zocazualas</i>	
<i>Zirasuala</i>	

Y o mesmo comportamiento se troba en os diptongos *-ie-* / *-ia-*. Por exemplo: *Astibiecho* / *Ardiquiacha*, *Canitiechos* / *Cariniachas*, eztra.

Curiosamén, creigo que tamién podemos siñalar bel exemplo de diptongazión *-ia-* en Ibieca. Claman *aire de Peatra* a l'aire que plega d'enta par de o Norte, prozedén de *Peña Peatra*, una gran peña que bi ha en o mon de Santa Zilia, enta o Norte de o termino monezipal d'Ibieca, indo enta Sierra Guara. Creigo que somos debán d'un malfar-chamiento de *Piatra*: PETRA > *Piatra* > *Peatra*. Profes que tamién astí coinzide a diptogazión *-ia-* en palabra rematada en *-a*.

Respeutible a ra *-g-* que amanexe tanto en *Bachirgualas* como en *bíñarguala*, más adebán se diz que poderba esplicá-se com'un loxico re-fuerzo consonantico a o fonema /r/ que, anque ye consonantico, tien un caráuter muito amanato a o bocalico.

Atros sufíxos.

O sufíxo *-ín* no se rechistra guaire en a Tononimia d'Ibieca. Se re-chistró sólo qu'en:

Albarines 'partida de mon en a que bi ha albars y chopos'
Carrascal d'Albarín.

Ye platero lo enreligamiento d'*Albarines* y *Albarín* con *albar*, castellano 'álarbo blanco', bocable que se conoxe y s'emplega en o charrar d'Ibieca⁴.

Os sufíxos achiquidors *-ico* e *-ito* no aparixen nunca en a Toponimia d'Ibieca, fren a lo emplego en bels nombres de presona, como se siñala dimpués.

Rematanzas.

Asinas, pues, en resumen, beyemos que os sufíxos que más a ormino se rechistran en a Toponimia d'Ibieca son: *-eta*, *-ón*, *-illo*. D'ixos tres, sólo que os dos primers s'emplegan en a fabla biba autual.

4. *Albar* lo replega R. ANDOLZ, *Diccionario aragonés*, p. 11. s.v., sólo qu'en as bals de Bielsa y Chistau con o senificado de 'álamo'. En atros puestos lo documenta como 'abedul'. Sin dembargo, o senificado 'álamo blanco' ye muito común y se puede documentar en quasi to l'Alto Aragón.

Entre os que menos a ormino se rechistran cal destacar *-uala* / *-uelo*, usual en a fabla biba, tanto en os nombres de plandas debanditos como en atros⁵.

OS SUFIXOS ACHIQUIDORS EN OS NOMBRES DE PRESONA.

-et, *-eta*.

Igual como en a Toponimia, tamién en os nombres de presona se troba a totiplé o sufixo achiquidor *-et(e)* (masc.) / *-eta* (fem.).

En o femenino a traza ye imbariablemén *-eta*. Anque ye muito posible que s'emplegue con atros nombres de presona, estió documentato en concreto en zinco ocasions:

Angeleta
Bitorieta
Jacobeta
Marieta
Orosieta

Truca ascape l'atenzión que belunos d'istos nombres, como *Jacobeta* y *Orosieta*, uei no son tan abituals como d'antis más.

En o masculino baría entre *-e* / *-er* (trazas que, antiparti, son comuns en to ro Semontano):

Joaquiné
Francher (termino achiquito de *Francho*, cast. *Francisco*)
Migueler (se documentó en: *Barranco Migueler*).

-ín, *-ína*.

Un atro sufixo que se documenta, anque menos agundán, ye *-ín* (masc.) / *-ina* (fem.):

Toñín / *Toñina*
Josetín / *Josetina*

5. Asinas, por exemplo, en *bucharguala* 'Arctostaphylos uva-ursi', que anque no se documentó en Ibieca, ye conoxita en muitos lugars de o Semontano y Sierra Guara. Yera una palabra que dica agora no se trobaba en dengún dicionario aragonés. Sólo en a 2^a edición d'el o dicionario d'ANDOLZ aparixe en l'apéndiz sin localización cheografica (zita a J. M. P. = José M.^a Palacín, como qui l'ha aportato en bel triballo).

Aparixe siempre en plural, d'alcuerdo con o plural usual en o positiivo *Angeles*, en *Angelines*.

En zagueras, bi ha un caso en que a funzión ye de femenino, pero a traza ye masculina: *Pilarín*.

-ico.

O sufijo achiquidor *-ico* ye talmén o que menos a ormino amanexe en nombres de presona. Cal parar cuenta que no se bei nunca en Toponimia, o que ye pro ta pensar que ye d'introdución rezién. Se replegoron sólo que tres casos:

Rafaelico

Toñico

Perico

-ito, -ita.

O sufijo *-ito / -ita* ye agundán, más que más en nombres femeninos:

Conchita

Carmenzita

Paquita

Pepita

Lolita

Rosarita / Rosarito

O zaguero s'emplega indistintamén en fem. u en masc., anque siempre referito a mullers.

O masculino se documentó sólo qu'en *Pepito*, como termino achiquito de lo ipocoristico de *José*, *Pepe*.

Bi ha que fer notar que *-ito / -ita* no amanexe nunca en Toponimia, por o que cal pensar que ye d'introdución rezién.

Rematanzas.

Asinas, pues, en resumen, trobamos como sufixos achiquidors más usuals en nombres de presona: *-eta* e *-ita*, que bienen a estar o mesmo, sólo que o primero en a suya traza autoctona.

En efeuto, *-eta* ye uno de os sufixos achiquidors que más se documentan en a Toponimia d'Ibieca, y tanmientres *-ita* no aparixe nunca en a Toponimia.

Cal pensar, por tanto, qu'en epochas anteriors estase *-eta* no sólo que o más usual, sino talmén l'unico que s'emplegase, tamién en nombres de presona, ya que —como contrimuestra la Toponimia— ye a traza autoctona. Fren a iste sufixo, aberba ito ficando se ne o sufixo *-ito / -ita*, no pas autoctono, chunto con os correspondiens nombres a os que s'aplica por un regular en os meyos urbanos. Pero talmén ya pro laso de contenito, pus en a fabla autual d'Ibieca emos puesto beyer que ye muito bibo l'uso de o sufixo *-eta* ta fer terminos achiquitos y, por contra, *-ito*, no s'emplega (fueras de os nombres propios de presona cuaternatos).

Como sufixos achiquidors menos emplegatos trobamos *-ín* e *-ico*, o primero documentato en Toponimia una begata, o segundo nunca, preba tamién de a suya introduzión rezién.

OS RESULTATOS DE VALLE(M)

Se troban en a Toponimia d'Ibieca bels deribatos de VALLEM que parixen corresponder a diferens eboluzions foneticas.

Os tres resultados que se documentan son:

- 1) -LL- > *-ll-*
- 2) -LL- > *-l-*
- 3) -LL- > *-ch-*

1) O primer resultado, ye dizir, a conserbación de a -LL- latina, se troba en o nombre común *a balle*, emplegato siempre en femenino, y en o suyo termino achiquito *balleta* 'bal, si ye chiqueta u estreita'. En a topónimia: *As Balles Altas, As Balles Bajas, Camino de as Balles*.

Tamién se bei iste resultado en *ballón* 'bal chiqueta', cast. "vaguada", que s'emplega como nombre común y en Toponimia: *O Ballón d'as Güertas*.

2) O segundo resultado, ye dizir, o paso de -LL- a *-l-*, u millor, a forma apocopata *Bal*, ye presén en o topónimo *Baldechumos*, documentato tamién como *Os Baldechumos* y en *Camino de Baldechumos*.

Talmén pueda estar tamién presén en *Regano de Balillas*. Anque en primeras se pensó en a probalidá de qu'estase un malfachamiento de *Belillas*, lugar güegante, ista se refusó ascape, ya que o lugar se denomina siempre *Belillas*. Asinas, pues, poderba estar un termino achiquito

de *Bal*, parellano a os documentatos en atras redoladas de l'Alto Aragón en as formas *Balellas* u *Barellas*⁶.

3) O terzer resultado, ye dizir, o paso de -LL- a -ch-, se documenta en *Bachirgualas* (tamién documentato como *As Bachirgualas*), toponimo de gran intrés, pus nos endica que a soluzión -LL- > -ch-, bien documentata en muitas redoladas a o Norte de a Sierra Guara⁷, ye posible trobá-la tamién en o Semontano.

A posible etimoloxía serba:

Bachirgualas < VALLEROLAS.

Ye muito semellán o toponimo *Bachigualas* (d'Escarrilla, Bal de Tena), que J. J. GUILLÉN fa probenir de VALLEM⁸, con a unica diferenzia de lo infixo -r- en o toponimo d'Ibieca. A -g- ye fázil d'esplicar: dezaga de consonán -r- no ye rara l'alternanzia -uá- / -guá- u -ué- / -güé-, puestar que amparata en o caráuter muito zercano a o bocalico de a consonán bibrán simpla. Ista alternanzia, antiparti, ocurre tanto en Toponimia (*Argualas* / *Arualas*, en a propia bal de Tena⁹), como en a fabla biba (*esquirluelo* / *esquiruelo*¹⁰, cast. "ardilla").

I beyemos tamién un atra coinzidenzia: o tratamiento -0- > -uá-, tan tipico en a bal de Tena y en atras zonas de os Pirinés Zentrals y mesmo de redoladas prepirinencias (se remeren toponimos tan conoxitos como *Guarga* y *Guara*). Iste tratamiento se da quasi siempre en palabras rematadas en -a, ye dizir femeninas; por contra, en palabras masculinas o resultado ye -ué-. En efeuto, ixa mesma alternanzia bi ye presén en Ibieca, en do chunto a *Bachirgualas* trobamos o toponimo *Tiñargüelos*.

6. Cfr. *Barella* en Sallent. J. J. GUILLÉN, *Toponimia del valle de Tena*, Zaragoza, 1981, p. 160.

7. Se beiga ELCOCK, W. D., *The Evolution of -LL- in the Aragonese Dialect*, Primer Congreso Internacional de Pireneistas del I.E.P., Zaragoza, 1950.

8. J. J. GUILLÉN, *Toponimia del valle de Tena*, pp. 102, 145, 151.

9. J. J. GUILLÉN, *ibidem*, p. 83.

10. *Esquiruelo* lo replega PARDO ASSO, *Nuevo diccionario etimológico aragonés*, p. 164. Tamién R. ANDOLZ, *Diccionario aragonés*, p. 130, qui, antiparti, replega *esquirluelo* y atras barians en un total de siete lugars. No cal, sin dembargo, í-se ne ta os dizionarios ta afirmar que ye un bocable conoxito y emplegato en to l'Alto Aragón.

A os efeutos que nos intresan, y como rematanza, bi aberba que considerar sólo que dos resultados de a -LL- entre bocals de VALLE(M): -ch-, que representarba una etapa más biella, y -ll-, que representarba una tongada más tardana, ye dizir, más amanada enta os nuestros diyas, d'acuerdo con o que, a o respetib, ya han dito bels autors¹¹.

O resultado -l- no ye posible considerá-lo de a mesma traza, ya que, charrando estreitamén, no se troba en situazión interbocalica (VALL(E) de Chúmos), sino debán de consonán.

11. Alwin KUHN, "Der hochcharagonesische Dialekt", *Revue de Linguistique Romane*, XI, 1935, pp. 1-312. As soluzions de -LL- se tratan en as paxinas 77-85, pero sólo i cuaterna exemplos de as bals d'Echo y de Tena y d'Aragüés, Torla y Bielsa.

W. D. ELCOCK, *De quelques affinités phonétiques entre l'aragonais et le bernais*, Paris, 1938, pp. 184-186. Da exemplos de -LL- > -ch- y de -LL- > -t- o -ll- de os lugars siguiens: Yésero, Plan, Linars, Chésara, Bielsa, Chaca, Pandicosa, Borau, Biescas, Embún, Aragüés, Bergua, Fanlo, Yeba, Buesa, Torla, Laspuña, Basarán, Sallén, Asieso, Espuéndolas, Sardas, Tella y Bierge. D'iste zaguero lugar, l'unico que ye enta par de o Sur de a Sierra Guara, replega o toponimo *Matiacha*, con evolución -LL- > -ch-.

O mesmo autor adedicó un triballo monografico a iste tema: "The evolution of -LL- in the aragonese dialect", *Primer Congreso Internacional de Pirineístas*. Zaragoza, 1950 (traducción en castellano: "La evolución de -LL- en el dialecto aragonés", AFA, XII-XIII, 1961-62, pp. 289-297). Os exemplos replegatos astí son toz de lugars clabatos enta o carapuerto de a linia Chaca-Boltaña. Seguntes iste autor "los casos aragoneses de ll derivada de LL se deben a la influencia castellana".

M. ALVAR, *El dialecto aragonés*, Madrid, 1953, pp. 177-181 y 266-269, cuaterna bels exemplos replegatos por KUHN y ELCOCK, a os que adibe belunos d'Aragüés, a bal alta de l'Aragón y o Campo de Chaca. Diz iste autor: "Respecto a -LL- > -ch-, mucho más escaso que -LL- > -t-, podemos pensar en una etapa anterior a t, y con apoyo en lo francés, ya que se localiza en las zonas más próximas a Francia, en tanto t ofrece una geografía más meridional". (p. 181).

Chesús VÁZQUEZ replega *Espinabiecho*, *Muriecho*, *Bichar* < VILLARIS, *Bachellas*, en a Balle Rodellar, siñalando que o paso -LL- > -ch- ye o que se troba en ixa redolada ("Toponimia de Pedruel, Las Almunias y San Hipólito (valle de Rodellar)", Argensola, t. XXI, Huesca, 1982, pp. 103-134).

Si a o toponimo *Matiacha*, replegato en Bierge por ELCOCK ya en 1938, achuntamos istos datos de a Balle Rodellar y os datos d'Ibieca (exemplos, toz, con -ch-, no pas con -t-), beyemos que se fa preziso endreitar as inesautas afirmazions d'ALVAR y enampliar muito más enta o Sur o territorio de -ch-.